

Aruba y Corsow ta reactiva proceso pa realisacion di e Fast Ferry



ORANJESTAD (AAN): E proyecto di Fast Ferry pa Aruba tabata un vision di Ministernan Chris Romero y Andin Bikker for di nan tempo como Parlamentario. Pa cu esaki, a realiza diferente gestion pa por sondea e posibilidatnan mas realistico pa por haci e proyecto aki un realidad.

A yega asina leu di a firma un MoU entre Aruba y Corsow pa realisacion di e Proyecto Fast Ferry entre Aruba y Corsow. Na su momento, e MoU cu a

keda estableci entre Aruba y Corsow, cual a wordo firma pa Ministernan Chris Romero di Aruba y Steven Martina di Corsow, a papia di un siguiente fase pa por sigui realisa e proyecto prometedor aki.

Reactivacion di e proceso pa e Fast Ferry entre Aruba y Corsow

Actualmente, Minister Giselle McWilliam a keda encarga pa continua cu e

proyecto di Fast Ferry entre Aruba y Corsow. Recientemente durante su bishita na Aruba pa e prome cumbre economico entre Aruba y Curacao, Minister McWilliam a ratifica e compromiso di Corsow pa realisa e proyecto di Fast Ferry entre e dos islanan ruman aki.

Pa cu esaki e siguiente paso concreto pa sigui ta, sinta cu e stakeholders tanto na Aruba y Corsow pa asina articula un grupo di trabou. Dicho grupo di

trabou lo keda encarga cu e realisacion di e diferente aspectonan legal cu mester wordo implementa pa e proyecto di Fast Ferry por bira un realidad.

Ta papia aki di e stakeholders di Gobierno y Sector Privado di tanto Aruba como Corsow, cu mester bini hunto y crea un vision mas amplio y concreto pa yega na un manera mas pragmatico pa trece un Fast Ferry den servicio.



San Nicolas Ports Authorities

San Nicolas Ports Authorities ta un entidad cu lo abarca diferente actividad portuario cu lo ta destina pa San Nicolas. Por bisa cu e preparacion di San Nicolas Ports Authorities ta bastante avansa caba, unda cu e leynan ta practicamente cla pa bay Parlamento pa pidi aprobacion. Di manera aki ta trahando diligentemente pa Aruba tin tur aspecto cla pa introduci e Fast Ferry.